

الباب الثالث

"باب الأم"

بقالي يا أمي تقريباً في كار الشعر ٦ سنين

أنين.. وفراق.. وعذاب.. وحين

وقولت كثير عن العاشقين

وع الوحدة اللي قتلت مين

وقوت مين

وعن حكمة مايفهمهاش سوا المجانين

وعن أحزان.. وعن خائنين

بقالي يا أمي تقريباً في كار الشعر ٦ سنين

وأمي مكانلهاش سطين!

وأمي عشان طهارة وذوق

مافيش مرة قالتلي أنا فين!

أنا آسف

وكان نفسي إني أكتبك

وكل ما باجي بكتبك

بقوم ماسح
مافيش في خيالي شيء ناصح
وقادر إنه يوفيك
وأقول برده هخليكي
لحين ما أقرا كتير وأفهم
وأكون قادر أقول فيكي

وبقرا كتير
وبرده لحد هذا الوقت
مافيش تفسير لتأخيري
أقولك سر
أنا وصيت كتير غيري
في نفس الكار
وشُعرا معلمين وكبار
عشان حالتي اللي ماتسررش
يمدوا العقل بالأفكار
أقولك سر؟
أنا مرة سرقت أشعار
عشان أجي أقولها لك

وهسرق برده بس إزاي؟
وأنا البكري اللي في عيالك
أنا الواد اللي أدبتيه
وعلمتيه
يعيش راجل .. يموت راجل
أنا الواد اللي عمره ماشاف ولا راجل
في جدعتك
ولا في صُلبك
أنا القلب اللي عاش يشكي قصاد قلبك
أنا كان نفسي أكتيلك
وسامحيني مانيش عارف
أنا خايف
عشان هيكونلي بيت غيرك وهتجوز
وهرجع برده متأخر
وهتسحب وأنا داخل
هقدم رِجل .. وهأخر
هتبقى مراتي صحياي؟
هشوف خوفها عليا تمام

كما خوفها على عيالي؟
هقول الحجة إياها
"مع صحابي بتتمشى"؟
أنا خايف تنام بدري ومتقوليش
جعان يا حبيبي تتعشى؟
أنا شعري بيوت هاشة
وأنتي ضحكتك دنيا
تلم القشة ع القشة
وتبني من العدم عشة
تسكن طير حزين شادي
أنا شعري قصاد منك
كلام فاضي.

